

求闕齊弟子記

求闕齋弟子記卷三十二

東湖王定安纂

哀榮下

祭曾文正公文

郭嵩燕

嗚呼 文皇初基值時否蒙公手承天日月再中蘇枯煦幽熙  
以雨風四海宴清孰匪公功公功在人德由身致始以儒興演  
邁涵肆咀含文章照灼天地卷懷一室周情孔思道喪才敝羣  
趨媚諧慳骨姱容躡迹崇階萌芽亂始積陰成霾抗言高談攘  
斥觚排萬口所譏公以理揆其所盛譽或瑱其耳惟不詭隨以  
衷於是單獨一心中自礪砥人於功名御智乘危攀躋校量公

退若遺及夫當事從容指麾弛張仁義沛然以施有或忮之構  
瑕抵讞脛艱嗔怒相顧驚疑公心坦然乾清坤夷名都大邦豺  
鼠充斥手夷大難如措諸席功謝不居受寵若惕胚胎賢聖功  
在疇昔自公初出眩愕刺譏既久怙息星光日暉終焉悍悍籲  
呼歸依莫知其由奔走獻欵尤於士心淪感彌宙江輪海納琳  
瑯在宥微長自奮接別窮岫流風百世伊誰云觀愚蒙自少公  
顧謂才驚喜問故曰與時乖曷云違時富貴浮埃奚所挾持披  
胸洞開發言吐氣戰鬪雲雷睨睨百怪笑怒噴猜涉世廿年齒  
冷心灰回思曩言詎我誣哉人生一世短長得失豈不自我亦  
豈能必聞公病月念往視疾枉書來招要以時日日及今茲左

疎猶明子肥子瘦能爲子評脫更需遲兩目俱盲子來不見徒  
聞子聲攬書涕零語諧心惻道之悠遠生身無翼效駕未遑承  
凶氣塞死生須臾甯能理測不往而來翩翩歸旛頓帷晝掩何  
有見聞愴懷平生誨化殷勤三十六年事往如雲天能爲人窮  
達天壽如公百年豈足云厚翼世保邦茲惟壽考冥器獲福於  
世何有天意固然其又誰咎余病早衰自視甯久奔號恍恍從  
公恐後隕傷在心視此尊酒

楊彝珍

嗚呼天步方艱還履康衢日輪已側仍返曦車賴公之力是匡  
是扶勳塞兩儀名溢八區有喙祝公長保碩膚永莫我邦免茲

邊虞胡不憖遺遽爾其殂廈去東棟難賦攸芋河潰金隄慮卽  
淪胥眾萬咸嗟豈惟吾徒繫公之生實闢間氣學成而仕適與  
時會蹇蹇立朝昌言不諱首請典學建陳古義繼論大禮  
排折羣議遂契宸衷重膺委寄苞彼槩芽發於邊裔席卷而  
東鳴張莫制驚帥跳奔益助寇勢起公苦塊墨衰從事慷慨登  
壇立舉偃幟苞納智策役使才能謀無遺算動出奇兵所向輒  
捷每懾先聲聞瀕危殆撓敗相仍風摧其觸火焚其旌莫敢或  
縮披羽先登崎嶇百戰天討以成盪滌江淮一洗羶腥眇古論  
功方召可培榮分圭茅仍秉旄鉞邦之三吳遙長朝列旋移  
畿輔以固門闕道用包荒詎改素節謂遲馮河恐集杞桎不量

而進匪覆則折容俟觀釁再圖翦滅知我罪我一任來哲豈意  
拖紳東首望 闕蓄志莫伸五內焚裂死淚盈盈漬眶猶熱嗚  
呼哀哉蹟公生平才大志遠遊目宅心不外墳典比萃羣儒日  
事排纂暇與觴詠還肆遊衍名流爭歸叢集無算我欲從之大  
江苦限追憶曩初投分匪淺有長必暴亦糾其短商定吾文嘗  
至十反卒則許之擊節稱善我除館職厥由題品堅辭北面視  
猶夷等過我論心窗虛月罔孤館一榻抵足共寢有犯孔戒刺  
刺莫際復起劇談呼奚淪茗荒雞四喔乃徐伏枕及我去國公  
心忉忉西之不得出餞於郊未飲先醉神逐旌搖南望郴永莽  
成賊巢亟反山中竄蹟蓬蒿公則帥師幾徧南交離逃踰紀重

我客勞屢投木瓜未報瓊瑤取喻輻轂藉解予嘲

彝珍嘗次公不報書公以

三十幅共一轂對誤  
幾問者多難徧報也

述遐心邇匪忘久要擬持寸莛再扣蒲牢

倏聞驛訃失聲而號山風振木愈助蕭騷簷雨滴階益增鬱陶

羣爲泄泄孰挽滔滔冀公有靈陰翊聖朝

汪士鐸

天眷聖清日月重光星精垂曜降於南洲邴平不朋卓上紫

宮風搏九萬抑畏匆匆儉德服士權盛不賴井絡之郊湖漢之

沚西王南金作貢天子銘几箴戩聖人有喜慳佐亂氓盜

兵潢池驕帥縱之匪怒而嬰公冀帝命爲簡之師退蒐衡陽

迺創艦楫止則駐防逝則奔馬風霆滿空聞其來下左視洪都

右拂江夏使賊肝腸邈焉九野士氣如劍或浮或沉公爲歐冶  
契合於深會有天機拔植高岑窅然位分見者傾心始迹洞庭  
喋血彭蠡欽示大符斧賊體魄益陽欽之合肥汰之賊有心肝  
介弟創之梟巢獵穴燔之膾之瑣兮遺黎甘雨霈之帝胙偉  
烈誓河苴茅公開東閣吐握英豪鱗介在遠懼不敢虓德量所  
涵島嶼畢包綢繆百年宅奠田植神有秩祀養有穀食類宮用  
羽澤宮較射國殤甄錄書林畫式萬井皞皞相忘帝力大福不  
終鞠凶吾人春相同輟銜恤舊恩聲皆徹天淚皆徹泉仰瞻箕  
尾四顧慙焉中園有葵豈止其身嗚呼哀哉

張裕釗



嗚呼吹自嬴劉芒芒百代光岳之精銷鑠散壤挈往校今百靡  
一逮姚姒子姬邈乎甯在孰謂並世歟還我公謝羣冠倫奮起  
湘中遂度千載蹈古比隆惟公林學三代與期六經百家窮源  
汎涯導達漢宋藩決塗夷於天地人靡隲不窺炳爲文章遷雄  
諾唯維公經務洞鏡治機曰惟五禮哲王之遺及兵與食國之  
大謀古稽而合今施而宜于聖之心仰而思之公之得人爲天  
下憂文武鉅公麾纛旂旄冠大帟耆彥會會旁逮羣倅豈足  
裒者若金競躍鎔於一冶公益龔亂再造九區忠誠饋饒雲龍  
北扶手提萬眾摧蕩甸渠南掩揚越北盡女水西指昆侖東至  
於海六寓褰開天海清泚老涕孺嬉絕蘇庭起凡公樹立橫被

八垓紛千萬億橫目之民怙公若父嚴公若神豈謂我公嗚若  
浮雲獨居深曠莫眊其津眾之所賦公之所哈公跂莫至夢舉  
想伊亶亶其邁戰戰其危贊元消殄潛運密移天眷 聖清庶  
其予回孰謂我功我其敢知孰謂我罪我其敢辭公平卓越直  
惟在斯徽烈之多迺公糠粃人之不諒云公逶迤吁嗟近古騰  
則躋茲如何奄忽天實罔極 九重震悼萬姓雨泣矧我小子  
靡所比似薄陋拙滯世之所棄辱荷公知區區文字譬海納川  
我乃溷澠暇日請謁公婁色喜評推古今往往移晷嘉我誨我  
我礪我砥翼我熹我畀我無已我屬別公昔冬之季孰云幾日  
遂隔萬世天下之痛一身之私哀來無端涕賈如縻公平有知

其稔子悲嗚呼哀哉

楊昌濬

嗚呼彤雲畫顏大星宵賁胡不憖遺補我 皇袞東南列州中  
外卿尹盡然心傷無有遠近 帝心震悼追念平成紀功褒德  
人臣莫京保傅先正殊典是膺河山帶礪太常勒銘猗歟我公  
天挺人豪因文見道物與民胞受知 宣宗摺笏立朝刪華振  
榦諧音簫韶道光之季高文典冊議禮春宮 廟廊動色應詔  
陳謨俾輔台德天下想望歸然柱石稂莠苞蘖始西南隅出柳  
掉尾摧陷名都荆揚鼎沸湘楚噪狐公倡大義簡車出塗白刃  
空拳出生入死折而不撓亂庶有豸義憤所擊市人國士校武

洞庭視吾旗鼓旣申軍律乃振天威九天九地電掣風馳鄂城  
江右殲彼重圍責重權輕忠忱不移人謂公才指揮如意豈知  
且明刻苦自厲吏不受約饒無簞食行間十年疢疾術智遭遇  
聖明受鉞揚徐制置列部金虎分符萬方告警崎嶇一隅大  
勇不懼是究是圖受事之初身非我有韉刀可抽柳或生肘批  
卻導窾誓殄羣醜蒼生倒懸奔命恐後左右兩軍曰淮曰楚二  
廣分馳犄角參伍軍諮祭酒材官强弩遂復 皇輿抗稜齊斧  
聯珠合璧上應元極寰宇廓清四維光宅相度視師糾逖王慝  
先帝之明我 皇之德節制四省公辭不居內輕外重元老  
躊躇履霜堅冰吁咈都俞所見者大偉矣真儒睠彼哀鴻輕徇

薄稅遺黎蘇息其澤百世屯田內充天塹外衛隸釐峩峩江流  
控制敬慎立法廣益集思秣陵元武漢官昆池徒尙威雄無裨  
放施超越往古精心允釐河洛視師碣石移鎮簡賢自代翊贊  
廣運推誠布公智效愚奮 詔還江南謳歌成韻昔公初臨爨  
突無烟比公之去都市萬屋昔公之去填咽不前今公重來如  
農逢年公顧歆然日慎一日老成遠慮罔敢暇逸臥治弗勞累  
頒 綸綍非不自惜用堅晚節成都之桑無入百株祿奉所入  
亦濟軍儲憂樂在民孰瘠孰腴家國一體斯言不誣公之勲名  
戒在驕肆發必由中外緣無累公之學問志爲氣帥析理淵微  
始終匪懈神明泰然翔泳百族大江南北以鞠以育騎箕天上

奪公何速溥海含識同聲一哭伊余末學幸生公鄉交公諸弟  
接公寵光羅師赴難公翼之翔錄其弟子示之周行嗣是以還  
音塵間隔讀公疏章想公顏色煌煌大文光映簡策措正施行  
民聽不惑歲星一周拜公畿輔信宿流連辱公褒許鵬鵬圖南  
密邇成矩斗牛分野好風好雨天胡不弔歸靈大荒公靈雖邈  
貽謀則臧儀鳳鸞羽羣鸞引吭治人治法允迪 皇綱 奎章  
飾終 恩殊典曠春秋烝嘗民不能忘鄉人述哀悼斯文喪爲  
天下痛屬辭悽愴

英 翰

嗚呼我公衡嶽降精視嵩生甫天佑中興畀我碩輔內幹鈞軸

外綏疆土百齡胡靳遽悲千古辛酉之歲相師載東輦鄴完江  
遂恢皖壖惟皖之恢掩賊背腹公畱鎮之里歌巷祝生死月骨  
衣寒食饑莽莽荒榛夷爲衢達公來皖樂公去皖悲龍山峩峩  
大雪遙垂謫材守土遙承公後美意良法是稽是守猶日咫尺  
貽我繩糾云何不弔喪茲耆耆師師皖僚公所陶甄熙熙皖黎  
公所拊循公靈西歸經皖之許雲白江清一觴敬舉我僚我黎  
灑涕如雨

恩 錫

嗚呼惟公懋德中興匡濟澤被生民功施沒世赫赫巍巍光昭  
冊史鏤古軼今名垂萬禩學究天人有本有用上窺姚姒下櫟

唐宋宏我 皇猷早登 綸閣道德光輝日星並燭揆文奮武  
戡亂定功坐了萬事決策從容知人善任簡材誓師齊楚吳越  
大難芟夷百城晏起不震不動戈投於野經橫於隴漸以歲月  
養以雨風瘡痍是蘇伊誰之功分茅胙土 帝乃酬庸伊維我  
公知遇獨深陰陽燮理股肱腹心千里邦畿以奠以乂南服重  
臨羣生永賴黃童白叟農夫織婦鼓舞歡呼奔奏恐後有害務  
去有利必因生息教育蹈德詠仁以人事 君虛懷引汲訪問  
咨諏心如不及經濟綽鈐支嫻武習才大不矜功高不伐非察  
爲明言寬而發海不擇流山不讓塵嶽嶽高風休休相臣嗚呼  
我公遭際之隆光輔 三聖慎始敬終如何我公端坐遽薨喬



嶽峯頽箕纒星落悲風入幃飛霧襲幙惘惘忠誠遺疏是陳  
天子震悼愍予良臣隆禮飾終上諡易名追崇 帝傳實光我  
清洛人罷市襄民泣悲古曰哀榮今乃見之嗟乎吾儕平昔  
從遊儀型今聞泉路悠悠尙想明德千古完人道未墜地光猶  
燭天在公奚恨斯民則悲爲天下勸匪哭其私

殷光鏞

嗚呼縣腰千禩否泰遞嬗濟世拯民功資翊贊昔在姒姬塵收  
召翰噓燼灌鄴洗武江漢光啟中興聲烈炳煥千載生公同勲  
異算懿公篤生昂宿降祥天誕英淑吐翼 聖皇早厯虎觀玉  
尺持衡既登卿貳嘉言孔賜 宣室前席指陳慨慷蒼生霖雨

爲海內望逮乎憂居湘南讀禮蒿目鴟張氣稜四起憤切同仇  
義旗東指酌酒登壇跳刀練士十萬封狼一軍蒼兕鎧仗明霜  
餘艤蔽水雲翱翔旂及鋒而塵初克荆峴再清漢皋鋌鹿逋駭  
黠狐竄逃乘瑕蹈隙潰隄決劫下游不解洪波復消吳山越水  
萬室漂搖 聖皇紹衣 法官側席壹意委任東南半壁方叔  
蕙珩元公赤舄鉅艱是膺納隍引責綜覽輿圖廣延策力推轂  
鄧鍾分猷靖勦三方楚敵五道合圍摧牙落距支解腹披桓桓  
介弟今謝征西稟謨宗袞誓眾登陣驚霆晝裂礮火雲低傾巢  
覆穴遂戮鯨鯢粵寇橫行蹂裂九服毒踰安史饑甚梁角自公  
視師摧枯振蕩偉算英謨終殄青犢力鞏坤維手扶 乾錄互

古戎功誰堪比。獨豈無郭李武夫。鞭撻孰如公。偉儒服建旄。豈  
無韓范莫敢。夏驕孰如公。烈洗蕩。驛鄧傳勲績。武侯盡勞合。  
爲一德。旂常獨高。帝用錫公主。瓚秬卣相秩。綸扉侯章綬。綬  
禮冠百寮。封崇羣后。帝用詔公。覲敷朝右。赤芾來造。丹宸  
望久千里。王畿倚公。控守北門。管鑰東郊。保釐公。涵以德懷。來  
遠夷。採九斫白桴鼓。息稀。帝顧江表。水火乍離。重移節鉞。惠  
養瘡痍。民獲還寇。望塵熙熙。公來三年。元氣亨毒。江波不厖。淮  
海弛柝吏。勉循良年。豐稭樵蘇。息黎元。含滋膏沐。民倚長城。方  
祝遐福。何圖一朝。箕尾騎速台。星夜折嶽柱。晨隕鼇極。旣奠棟  
樑。遭災芒芒。湘水黯黯。秦淮風淒。蔣阜華沉。雨臺百城。屑涕七

萃騰哀飛章入告 九重悼懷灑沐廿年未親袞補天不憖遺  
喪我碩輔 飾終典隆 易名禮古涑水遠疇睢陽近伍紀積  
大烝藏勲盟府想在夜臺銜 恩入土公名不朽公忠益豈讀  
公遺表惓惓 經筵上迪 聖德下述民瘼邊烽外患愼固幾  
先身沒九地心懸九天輟春罷歌徧於人間而我吳民尤承陶  
治孰非公德耶隴廬舍昨歲巡行蘇臺繅馬遮道歡呼羣頌純  
嘏曾幾何時臨風淚鴻怛化一宵含愁四野義冢南嶽公德并  
崇浩浩江流公澤比洪垓恩召伯碑泣羊公徒攀馮樹孰嚶房  
驄虛堂暖畫靈旗颯空敬侑蘭酌式儀清風嗚呼尙饗

張文虎

嗚呼公之生也天固將以大任責公當其立朝而侃侃人已  
欽其不苟異而苟同及粵事之起毅然舉義雖疑謗交集而自  
矢其孤忠創水師以剿賊沿大江而遂東歷百戰以至皖屢瀕  
危險而賊亦潛避其鋒惟其推心以置腹故自僚屬將卒莫不  
踴躍而樂從於是知師干之總非公莫屬此所以蕩平吳越而  
卒收其全功嗚呼公雖有兼人之稟固已疲於戎行之十載况  
又盤根錯節無一日之息而往來奔命於南北之衝以江南之  
艱鉅當大創之後維持補救豈敢安坐鎮而自比於衰慵此其  
未臻於上壽也蓋鞠躬盡瘁而不由於六氣之沴二豎之攻嗚  
呼公之器識度量遠超乎世見之外故其和氣謙德實能自忘

其功業之盛與爵位之崇其於文章學問洞悉本末每自視歆然與人爲善而亦不眩於門戶之訥其接物也摩義漸仁而使之自化其垂訓乎後嗣也諄諄乎惟義利之辨伎求之戒而孝悌之是宗此不特古來將帥所未有卽名臣大儒亦尠及其從容固宜邀殊常之 曠典而蒙 特諡於 九重嗚呼黃流洶洶西寇猶兇陸有蛇龍莽有伏戎假公數年庶諸患息而元氣漸充乃一朝而長逝使天下感喟於無窮嗚呼公何往乎彼野哭而仰望者徒見光燄之燭空其騎箕尾而上升乎將臨照乎斗牛之分而全吳士庶永託於悱懔嗚呼哀哉

錢應溥

嗚呼崧嶽降神實生申甫衡山嶽巍濯靈湘楚篤生我公兼資  
文武旋乾轉坤提壘籍戶若士農工爰及商賈以引以翼無不  
得所劬躬燾後宜受百祐撒手騎箕長此終古惟公一身伊呂  
臬夔三代而下孰與等夷溯自通籍及贊綸扉垂四十年眾望  
咸歸手成大難身繫安危奇功偉烈樹之豐碑摹繪日月莫贊  
一詞小子不敏請言其私庚戌之歲挾策上都大賢門下幸獲  
步趨詔我經術折衷漢儒助我言行軌範程朱自是過從無間  
晨夕邵位袁密契嗜書成癖容我參語謬附提籍期我遠到  
金門射策舞鶴氍毹依然鍛翮三載春明迅馳駒隙公歸梓鄉  
烽火連驛義聲所樹無避金革我時簪毫樞垣奉職屢讀公疏

雄詞翕闢軍事成敗驚心盪魄百折不迴躬自貶責悵望衡雲  
神馳形隔會幾何時春秋十易日惟庚申吳越廢爛軍書旁午  
鄉音中斷請急南歸奉親避亂辛苦賊中生死參半涉海泝江  
敢影私館自分此生草間逋竄忽奉公書招赴戎幕命司章奏  
欣然有託娛侍高堂天倫至樂回溯京華依然如昨先子積學  
校書萬卷公夙神交而未識面比來皖江歡然相見躬造敝廬  
傾談不倦材官走卒亦疑亦羨及我居憂生芻來奠溫語拊循  
深情繾綣至今思之淚下如霰上元甲子大功告成相從東下  
卜居江城追維疇夕始慶更生將挽銀河洗此甲兵猶有餘孽  
鯨鯨縱橫 皇帝曰咨命汝北征席不暇煖奉 詔卽行我仍



隨侍水驛山程亦云負笈匪日請纓由徐達淮是類是禡舟師  
十萬星言夙駕巨浸稽天洪流怒咤時維朱夏雷騰龍下颶風  
忽起黃沙激射舳艫傾危萬眾色訝急覘公舟公猶整暇共歎  
艱險能以誠化公曰不然是殆天假舍舟而陸移師周口惟此  
要區孤軍扼守賊眾如蟻環堞左右公夜讀書氣壓刀斗萬柝  
噤聲惡氛退走琴書怯敵斯真親覲 帝眷南服資公坐鎮治  
軍治民同一忠盡我違晨昏二年缺訊歸諭母氏新霜添鬢惟  
公錫類仗公誠信遠遊遄歸曾無悔吝幾輔重任非公莫屬建  
節量移北門鎖鑰我戀庭闈欲行又止公體人情慰語移晷祖  
道潛然味苦彈徵身滯江南天末延企手札時來捧誦竊喜自

公之去民望若霖祝公之來公果重臨歡聲雷動鼓盪元音大  
裘庇遠冬日愛深治河籌海經緯一心德威懾慄內外不侵謂  
可永戴而倚高岑胡圖一載蔭燄豐霽悲雨灑空虹光燭宵街  
衢聚哭薦芷焚椒天胡此醉福不可徵憶出師門歲星兩週親  
侍儿杖十載勾畱涓埃寸滴高厚莫酬數公幕僚將相輩出曾  
不數年蜚英騰實嗟我驚下半生橐筆願從公久情誼專壹正  
論微言窺公慎密恢諧談笑樂公真率疏橐滿篋點竄塗乙一  
字推敲罌無旁溢忍淚檢尋音容髣髴公手扶雲公心捧日天  
鑒忠誠新官久待千秋萬禩是主是宰一瓣心香告升鼎鼐風  
馬雲車神兮斯在嗚呼哀哉

李如昆

嗚呼我初見公忠烈是介敬由中出愛匪在外遂闢西室以永朝夕一語之元一字之奇摘以相示兩心怡怡自遷坊局志學益篤雄剛之氣痛自斂束潛心遜志惟曰不足憫時浮僞盡去其樸力追先學誠身慎獨求闕名齋神鑒其誠投以大艱不震不驚我歸自燕公練於湘握手相視鬢髮頓蒼息兵日久羣情震愜公以神運水師用張自公東討我臥清澗心欲奮飛貞疾罔瘳旣收皖城大開幕府一時羣萃酒龍詩虎環顧無我心結不舒遠棹赴之其樂愉愉憶嘗從容問胡文忠年雖未登名則無窮緊後死者曷其有終豈知大功待公而奏大名大寵非公

莫副髮逆除矣捻患益急公徂東山病不遑息鞠躬三載舉賢  
以代一掃而除不畱纖芥但竭其力不尸其功 帝用降鑒移  
領畿封津門之事豈非由他中外一視匪偏匪頗彼事外者妄  
肆譏阿婉言以謝甘受時瘥 太任在上 成王在左曰微相  
臣誰恤予禍屢請不允還公於南民曰吾父萬首是瞻方公之  
去始有里閭今公來歸田桑可娛天乎不慙曾未一紀遽捨吾  
人而騎箕尾 皇心震悼特謚表微 天語切至聞者涕洟嗟  
時才彥妄與公競豈知公量湖海包孕魚龍萬怪過擲不見陋  
彼河伯望洋驚歎迨公之沒羣情皆息無知無愚靡不心服惟  
天難謀終始不易厚終之典迴逾於昔何以致之誠積於中功

則盛矣德罔不充公有令子妙簡 帝心承 恩繼武罔有弗  
欽次君內朗有嚴不恍沉雅之姿亦克公肖顧惟鄙薄頁知非  
一學無所成行無所立去公日遠公不我瑕愛我勤我老而彌  
加客歲大閱江海周歷訖事於冬函書親封公於立言最尙清  
省施之簡札約而能盡獨此復書語不可止多至七紙意猶未  
已豈其前知殆將歸與平生之愛盡此一書如何遲遲今始云  
獲開緘讀之疑公尙活明明歐生至親匪遙赫赫 隆恩已見  
邸鈔嗚呼逝矣良駒莫追國失所毗民失所依卿士大夫失其  
表儀不肖微志從公於嶽今其已矣將安所託歿不視殮葬不  
臨穴白馬素車此風遂絕馳辭以告肝腸碎裂

舒卓元

嗚呼自濂溪起於北宋及今已八百歷年名臣碩學代不乏人  
有明惟茶陵稱賢我朝則有雲房劉氏起家翰苑薦登揆席  
蓋太平潤色世莫得而稱焉惟我夫子應運而出乃獨逢天步  
之屯道其百折不迴之氣足以掃平乎羣盜而鎮撫乎蠻夷自  
道光朝以迄今上之御宇厯三十年如一日而力任鉅艱門  
下士爲將爲相承公誘掖薦拔者何啻列宿之共乎台垣惟公  
不矜不伐直至易簀之日而未卸乎仔肩公薨於位士民之巷  
歌罷市者亦如諸葛在蜀司馬在宋而願相殉於重泉兩宮  
聞公之沒也應痛惜不弔於昊天其豐功偉烈宣付史館者恐

非數萬言不能盡編小子之受公知乃在庚戌 廷試關節所  
不到而獨結香火之緣自歎駑劣之質見公勤勞王事竟未克  
與乎執鞭蓋深山奉母實未嘗函丈乎周旋非公之不我知也  
豈數奇而使然而今而後天下大事不知繼公而後者果能如  
公之休休斷斷而無所黨偏公之鞠躬盡瘁也可謂生全而歸  
全顧公雖辭世靈爽在帝左右默相我 聖清景運億萬世而  
緜延其庶幾公之遺民戴餘蔭者宅爾宅而畋爾田雖飯蔬以  
沒齒兮亦何憾乎寒璫惜乎窮儒著述不及請公之鑒定而乞  
公之弁言一觴酌於靈几兮不自知涕淚之淪漣服心喪以終  
古兮成連去而誰賞乎俞絃嗚呼哀哉

羅忠祐

嗚呼夫子生稟河嶽之靈沒爲日星之精其以小心策大猷也  
如忠武侯之盡瘁其以專閫扶 皇運也如汾陽王之威名其  
任兼將相措天下於磐石之安也則魏國忠獻之純誠其推闡  
儒先綜事業於學問之懿也則涑水文正之生平方 宣宗皇  
帝臨朝之中年簪毫授簡起爲詞臣海內之士祝瓣香而尊山  
斗者已慕乎天人治安之策與湖海灝氣之文迄至厯事 三  
朝身爲柱石整乾坤而新日月苴茅土而壯金城凡夫子之偉  
績與持躬之清正上書 國史下播蒼生煌煌 聖訓宣布昭  
明固無俟門牆下士覩縷璵記贅揚乎蓋代之人而感念酬昔



悲涼淒清獨有隱觸夫私痛者殊不能已涕泗之交零觥觥元老格天有誠槃圖孟方規尺平衡表忠一疏皇聽爲傾當貌孤之先世撫海疆而抱貞嗟關門之失牡致虺獠之縱橫障睢陽而岌岌無賀蘭之援兵射蜮沙而被毒攢鳩媒而爭鳴惟夫子之古誼兮瀝肝膽而達九閭也倡發微之宏議兮撥細響而震堅錫也是猶拂琳珉於塵壒扶荃蕙於荆棘龍章炳兮廟貌煥荔蕉薦今天日聲俾夫重泉慰兮精氣吐昭宇宙兮揭日行念煢煢而再造幸立雪之依程其翼宇西華提振僮僮淵乎真意之輪匝匪僅儕於眾庶猗苓之侶與三千桃李之英樹風義於兩世繁嵩華其峻崢忽巖巖之遽圯迺盪魄而驚轟思

音容其如昨求罄欵以難尋如慶雲當空天風忽吹之以墮去  
如太行方仰夸娥忽負之而長征嗚呼白駒隙過滄海時更憶  
侍先人初瞻河岱扇之以冲和期之以超邁歲歷十五憂患中  
攫夫子之掀揭天地震鐫古今固幸引領以觀大勲之成也而  
胡爲山頽木壞紫金之上白門之下鵲唳鶴唳迴翔酸楚而呶  
嬰以我夫子生有聞於當時沒有傳於萬世苟能如此足矣又  
何悲思之繁惟是人之云亡瘁在邦楨萬家羊杜何祝何賡  
天子震悼中外失聲矧不才之宗依而歸命得不爲之淚墮如  
綆盈羈一官於三楚迓江上之銘旌摧心肝於瞥覩扣師訓而  
誰磨奠一樽之椒酒庶幾乎靈其來享冉冉於青虬之御而不

拒夫黃鶴之迎

方俊

嗚呼公平禍亂降福江淮會不數年移蔭金臺公在畿輔民望  
公回每逢北客問訊徘徊飲食必祝恐公不來節鉞南返歡迎  
如雷謂軍有司命官有表儀吾民有乳哺士有所師富者益市  
酒食相娛樂貧者自以爲可得鬻糜非公能家賜而人給之也  
而人心堅定皆恃公在以爲可安而不危何圖元老天不憖遺  
然使無桀鰲之伏莽無腥臊之梟夷河運無郛城之潰決軍門  
無仰哺之隱私則台星宵折雖民無與蔭庇國無與決疑而  
制度謹節蕭規曹隨凡百君子尙可以勉爲支持無如傷弓悻

羽聞弦神疲謂公在鎮澹然無爲卽夕一卷晨一棋延嘉客話  
詩古文詞而天地民物之蕃變吉凶同患之大規威稜勝算入  
人沁脾如江河浸灌岱華屢屢默有以消邪僻之志慮而變化  
於人所不知今於窺園俄頃無疾騎箕旣未垂士紳之法戒將  
何以解吾民之憂思公之仁兮公之誠兮乃忍使吾民瞻望垂  
泣爲失慈母之嬰兒哉嗚呼哀哉

陳世鎔

嗚呼我公神維嶽降應運而興早登霄漢式握文樞疊侍清  
燕海宇又安雍容藻翰鸞序鴛班時聞謀斷未際艱難孰覩魏  
煥森爾小醜粵西跳梁疆吏玩之叫譁以狂棘門兒戲視爲故

常山崩川沸遂驚八荒皖處其腹厥殃倍之老稚轉壑壯者散  
離盜之所邁斧吭決肢哀此皖人孰告其傷天之牖民如圭如  
璋乃命我公督師其鄉公既秉節創立湘軍大治戰艦水陸互  
根遂收岳鄂高屋建瓴救民水火攬轡澄清任天下重畛域奚  
分豫章十州指揮略定次及皖邦盈科以進封狼驅羆所在穴  
巢我師攻之時爲所噪公能忍之百折不撓運之掌上操所莫  
逃鸞鳳之飛百族羣從况乃伊呂出於伯仲壘唱簾和無所不  
儲狂寇滔天如枯朽摧旣克皖城六轡在握雖以金陵蛟鼉之  
窟石城虎距勢已破竹始時皖人懼無子遺今相昏嫁如烏哺  
雛始時皖人覓竄雀飢今安耕織粒食布衣公謂皖邦人文之

數學殖荒落厄於陽九既剝而復故業宜守厚等廩餼以善厥  
後禮其俊乂尊其賢者長揖三公座中屬觀樂道忘勢庶見吐  
哺仕優則學飾治以經六典餘閒朗朗誦聲學愈不足三命益  
恭不朽者三立德言功學之山斗人之曰星東南祝公松喬等  
齡庶富敎我長我子孫忽聞山頽棟折榱崩婦孺走卒涕零莫  
禁況我士民實賴生成公生則神公薨則靈神爲民所依靈爲  
民所憑神民相憑依作廟皖江濱皖山亦南嶽足以棲神明神  
尊配嶽瀆無徒戀湘衡高堂邃宇靜閒幽清蘭湯椒醑華配芳  
馨雲中森舉其來格歆於萬斯年祐我皖人

王家璧

皇清同治十有一年歲在壬申二月初四日戊午

贈太傅武英殿大學士世襲一等毅勇侯湘鄉曾文正公薨於兩江節署家壁出潼關聞有凶問至徐溝乃見邸鈔中心悲怛不敢野哭至京乃哭諸寢而未有文也六月十一日甲子又隨鄉先達公祭於湖廣會館然公之薨豈獨吾楚人所同聲悲歎哉昭忠賢良己有

命祀吾鄉寒溪懷忠祠祀林文忠公至胡文忠公暨諸有功德於楚與楚產之死事最烈者近又增祀文忠駱公文恭官公矣祠初落成文正公與胡文忠公暨今合肥伯相黃陂金可亭侍讀嘗同時游歷其中遂定緩蜀圖吳之策丁卯家壁從文正至

徐州合肥相見首稱此會爲難再知文正精神或亦時在此也  
聞吾鄉人增祀公家壁不能已於言乃爲文遙致祭告令從子  
諸生世瀛詣祠薦馨而讀之曰嗚呼我師功在天下非我獨私  
名在天下非我獨知嗚呼我師功在天下我獨私之名在天下  
我獨知之我初識師愛我以德萊衣贊行爲我心惻 天恩賜  
環公與有力成我之志此德何極嗚呼我師非私我哉我之知  
公願質諸天下後世嗚呼我師咸豐初元應 詔陳言 君仁  
臣直忠誠以宣粵亂日長羣盜如毛吳楚燕齊豕突鴻嗷民不  
知兵恬熙日久長江天塹悉爲賊有萬艘橫江去來如風民莫  
自保師多無功楚氛最惡公方居憂 帝命討賊敵愾同仇投



秋誓師經不及墨一檄飛傳脅從皆泣薦拔將才羣英爲出知  
人善任師武臣力敗不諱敗功不矜功但知有國不知有躬  
百折不迴激人孝忠靖港之挫公將殉焉湘潭大捷中興轉  
關陸有塔羅水有彭楊胡蔣三李虎變龍驤戰艦制賊議始岷  
嶲鄂垣再復公功最高橫江鎖斷萬艘齊燒田鎮半壁樹劍山  
力天塹歸我賊保危巢水陸並驅公爲功宗檣立帆駛快蟹長  
龍九江三吳在指顧中巢危不傾天未厭亂火起江心如星輝  
電夜黑軍驚垂成忽變賊由蘄黃復襲江漢塔畱扼前胡公回  
援彭蠡長江水師中斷公以羅軍徇江西境艱危萬分以暇以  
整仗此忠誠非微天幸鄂事日棘分羅助胡胡公愛才與公合

符志高下人才大用人公與胡公賢之所親下人志高用人才  
大公與胡公 國之所賴人樂爲用互相援應復楚圖吳湘軍  
復振公再聞喪奔不俟 命 帝再奪情堅辭不聽援浙援蜀  
申命在途官公胡公奏留圖吳 授鉞兩江進皖南北祁門  
堅持安慶戰克舉李趨滬薦左援浙我有金陵賊踞爲穴十餘  
年來莫剗草竊惟公兄弟久而後得兩弟殉忠一弟成功惟孝  
克友惟孝克忠一門忠孝諡美爵崇受 恩深重小心自持吏  
職交勉 朝權懼移漸防外重端杜樹私謀 國慮遠厥惟我  
師善處功名厥惟我師嗚呼我師難再覩之金陵之克我先艱  
歸服闋從公鴻口是依公適有疾 帝命莫違西追遣劉東剿

屬李鎖鑰南疆恃公臥理朔淮入江從公南行別公入朝觀  
水大瀛西捻救東勢趨畿甸左公以劉截賊北面左李并命  
徵兵入衛道在和衷請勿遇制天子命我從左公軍充豫燕  
齊風馳電奔賊殲直東軍移入秦公來畿甸不得再見有書未  
達誨我胡倦嗚呼我師於我何哉我行畿輔荆棘道生兵雖殺  
賊民亦薶兵忽聞公來劍耨刀耕昨如萑苻今如華胥夜戶不  
閉夜行無虞仲尼治魯有以異乎天津一獄偏於柔遠清議然  
疑引咎不辯我初亦疑退而深思及聞公薨乃見公心公功已  
成公力已瘁兵端一開恐難終事去天咫尺投鼠多忌一有  
不慎如何可悔用兵之慘公目擊之任事之艱公身歷之豈無

天幸一戰而勝勝亦兩傷奚但甘命彼方內亂誰與我爭吾且  
柔之以爲之名匪寬海國以安遠人海外有截先民亦云灰心  
忍事霜鬢論兵耿耿晉公同公此心嗚呼我師豈不然哉豈不  
然哉迴節兩江未久而逝畢公之力遂公之志嗚呼痛哉我初  
而疑我繼而思何知我師之晚哉殲賊直東劉多戰功士飽馬  
壯實隸元戎知人之明謀國之忠松山之功亦公之功左公  
衷言早達聖聰嗚呼公功豈惟直東虎穴百戰湘軍最雄西  
夏舊巢剷除一空誰知是役亦公之功嗚呼公功奚但此也以  
人事君功之大者羣賢之功皆公之功功成不居皆公之忠嗚  
呼我師實爲功宗南嶽峯頽誰繼厥蹤嗚呼痛哉嗚呼我師昔

與胡公相約死 國互託碑銘後死之責公表胡公不遺餘力  
九原相見兩無愧色公之薨也誰表公德公自不死史臣有職  
羣公累章各述見聞 宣付史館萬古留芳文忠之才似張江  
陵文正之學似王陽明百世之下聞風其興嗚呼我師夫何憾  
哉昔從公遊方理學案丹畦茶雲與共夕旦鏡海唐公鍼芥相  
戀藕耕先生萬里論辨艮峰筠仙互參所見公之所學體正用  
通恢廓藕耕頡頏艮峰舍功論學亦爲儒宗吾道非迂體驗在  
躬嗚呼我師開世贖羣我師而逝孰發我蒙嗚呼痛哉忠祠落  
成己未之秋公以援蜀至於黃州胡公駐師方爲皖謀合肥在  
幕侍讀在州定策忠祠偕寒溪遊有桂之樹千雲如蚪盤桓其

下將去仍畱緩蜀急吳東南以收文恭入告其心休休祠中諸  
賢忠孝之儔師友將校各有千秋愍烈靖毅公之同氣先後入  
祠馨香勿替人來祠中間木犀香封植嘉樹無忘甘棠今復祀  
公千秋一堂骨肉歸土神無不之嗚呼我師靈其在茲蘋蘩用  
薦永懷思壽 國福民無有窮期尙饗

曾國荃

自聞兄訃今逾三月哭不成聲勸斯次骨生弗能事友恭道闕  
背面八年未嘗奔謁林下之遊相期白髮豈意願違倏焉以歿  
哀我父母生我五人弟性頑頓兄志如神愛憐諸弟白首若新  
吹簫仲氏克葆天真奇才愍烈竟死不伸于季靖毅行役苦辛

一病不起與鬼爲鄰我在人間今亦五旬退休里閨旣吟且呻  
五十年中憂患飽更未及垂暮哭我伯兄伯也執殯紛爭以平  
國賴締造民慶再生百僚有長諸侯齊盟功成身死實哀實  
榮朝野同悲矧予友弟兄歿江南我居湘邸歿不憑棺奠不薦  
醴何兄友于而弟不悌迎匱長沙哀鳴出涕中夜以思厥類有  
此兄念鞠子視之一體弟因人成兄實天啟壯士挽河甲兵一  
洗運際遷流誰知所底惟兄之存恃以無恐君子見義必爲斯  
勇羣小縮手不寒而慄夔典秩宗皋有邁種今其已乎誰荷  
天寵 國無師保野鮮承奉下哭其私反位成踊以我羸弱豈  
能任重不學無能何異闕茸辜負教訓四十九年昔我乘氣自

謂無前兄裁以義翻不謂然一再試世重踣而顛弟以剛折兄  
以曲全迄我知德兄歿九泉誰與論道吞不復宣望靈垂涕鳴  
原百篇憶我髫齡相從京國兄官檢討不遑日昃寒暑不時我  
躬是賊兄旣藥之徬徨我側百拜終宵虔視斗北我病旣痊喜  
形於色解手南歸勗我以德一別十秋燕城楚域渺矣慈雲恩  
同罔極相見之初五經俱墨時逢百六盜起如毛中原鼎沸孰  
諳六韜惟兄天挺僉曰人豪 成帝顧命猶典禮曹朝陽鳴鳳  
眾議莫撓 顯皇善任授以旌旄不辟金革罔憚劬勞持節誓  
師興於桑梓博集羣策折衷一是我有贈言謂我不鄙明條三  
十今猶可紀遂創楚軍爲角爲犄稅駕衡陽舟師之始水有彭



楊陸有羅李規復岳鄂迅如彈指天未厭亂兵鈍鄱陽兄保江  
右重理帆檣蠟丸爲書問道來湘我始聞之勢轉倉黃廬陵太  
守謂我克當授我一旅駕言騰驤章貢合流一水相望書生從  
役將父不遑忽報椿隕地老天荒兄旣星奔弟亦匍匐荆棘滿  
塗蓼莪廢讀我克吉州兄已起復相晤建昌營次信宿任我休  
沐返吾初服如有禦侮後先惟叔譬諸股肱輻共一轂旣平景  
鎮遂下浮梁從軍盡瘁偃息在床風雨之夕兄詔我旁謂我年  
少膂力方剛世猶多難兵且未揚閭人孔多惟子其良寧捐尺  
短無棄寸長東征之役與子翱翔練兵太湖全皖在握我爲前  
驅兄籌幃幄移駐祁門與賊相角同時被圍誓書頻數軍不可

據安如山嶽江南之定惟此最倬何氏銘勲獨能揚摧迨克安  
慶兵機益利大鵬高騫扶搖展翅小鳥託巢因風不墜兄制兩  
江位冠羣吏弟爲屏翰 詔許毋避兼親與長少雙寡二飛軍  
以東予我一轍濟師助我恐失右臂風利不泊徑抵石頭頓兵  
城下自夏徂秋環攻地道薰伐賊謀豈知逆命復來狡首方張  
之賊百萬爲讐我方被困兄切隱憂一戰卻敵賴有貔貅捷書  
夜至有庸必酬二月初吉輪舟來訪椎牛犒師徧及諸將竝馬  
而行詢余以壯痛鉅創深何幸無恙余敬告兄堅忍爲上九地  
九天十決十盪以靜制動敢與相抗兄聞茲語彌深憫悵又越  
一朞乃告成功匪弟之力惟兄之忠 帝嘉乃績異數同蒙我

苦軍旅旣疲且癯告歸局促別緒恩恩自茲以來尺素惟通兄  
渡江淮小大從公削平捻逆仍返江東我奉 簡命荊州作督  
比匪之傷謬獻忠告志未克伸知足不辱退賦遂初如垢獲浴  
兄負重望華夷瞻矚移節邦畿明刑謹獄首夏清和病在牀褥  
忽報海氛西人來毒眾議洶洶津門沸騰兄鑒覆轍如不克勝  
孚以誠信示以準繩如有不測與躬俱膺爲 國受詒社稷所  
憑彼鹵莽者妄肆愛憎譬諸朝菌晦朔自矜又若夏蟲語及於  
冰惟兄謙退不矜智慧盛德若愚艱難宏濟返旆東南謳歌慈  
惠人任仔肩曾不少憩大閱旣畢小心益勵公餘之暇游於文  
軌冀享遐齡掌 帝之制何期中道棄我而逝嗚呼哀哉天寶

爲之民哭於巷墮淚有碑誰興百廢誰守四夷 兩宮之慟  
一人之思閔予小子事兄如師死休生闕誰其我知放聲一哭  
奠此哀辭於戲我兄畢世勤劬名垂宇宙遺憾毫無克家有子  
能紹楷模諸孫林立清聲鳳雛教誨之責我與兄俱九京瞑目  
尙鑒予愚

何璟

朔公誕降湘水鍾靈翱翔翰苑講習 帝廷世構龍蛇時逢屯  
剝志就龍驤功成虎幄戡亂江南秉鞭作牧雨洗瘡痍風清水  
陸析珪受瑞五等封侯 紫宸顧問黃閣謨猷千里邦畿移公  
疆寄慈以泣民版以察吏槐廷日永藻甸春多沈羊罷飲魯虎

消苛文武吉甫萬邦政秉使節南來江淮引領羣生成遂時序  
太和鱗塘捍海鯤壑導河丙傳功名申侯保障勤宣有錫祐篤  
無量旋罹疾風電迴旋樛摧奄及不弔昊天生死公忠遺疏  
入告戀主千言皇心震悼恩施優渥禮備飾終典隆  
上謚秩進三公璟夙仰大鈞藉聞清誨忽覩旌銘追思謦欬思  
公秉性忠孝深純溫如瑞玉直似貞筠思公清操素風同仰一  
衣不辭二簋用享思公才學古茹今涵文章名貴理道源探思  
公幹畧持危定亂身歷艱難胸具識斷樞機周密衡鑒無私求  
賢若渴主善爲師宜享耆年天胡不憖禍祚後賢於公益信靈  
車將發祖奠在塗風雲感動道路悲呼氣化推遷空瞻劍佩百

世高勲千秋遺愛

周壽昌

公之稟道槩程絜朱融合王陸不峻其隅通天地人是爲大儒  
公之陳藝班馬卿雲揖韓抗柳陶冶一鈞經經緯史是爲大文  
公之秉國邪閉善陳求賢若渴直諫忘身天下自任是爲大人  
公之立功志剛養醕韓范而武郭李而文氣塞兩間是爲大勲  
凡公志業惇史悉錄史逸野編笑煩累牘所亟不忘公與約言  
篤摯沈痛思常盡然公云任大須先無我謀濟於同力成於果  
人才我才用不必區我功人功身不必居苟利國家豈必我名  
亂平時泰不爵猶榮公云濟難毋以死辭一死我畢難豈人貽

惟畱此身極艱備苦人不能謀我籌救補一息尙存萬死無去  
竭慮圖全迺盡臣志大臣於國榮辱共之我名獨榮辱將在誰  
早作暮思隱忍匡扶事乖願違皆臣之疚過不肯辭心不忍白  
皖然無汚卒光日月公學之大公志之堅公德之厚公才之全  
三代而後篤生此賢伊呂諸葛庶幾比肩

徐樹銘

吁嗟我公毓天之英鍾地之靈維河維嶽維日維星吁嗟我公  
秉德純粹學窮鄒魯文標舒詎肇職詞翰陟輳貳卿忠橫疏草  
智秉文衡王道平平俄聚羣醜屠城據邑毒此倪耆東南萬里  
如沸如羹野無完聚國無堅城痛哭苦廬枕戈建義設團投書

翦蒲御士搽側索隱簡忠進良百歷險死淹收眾長議創水軍  
橫海伏波角陸並進驍鮫磔毘始廓洞庭踵夷鄂疆勲銘潯岳  
捷奏鄱陽從衡江淮盪滌吳越都十二年興行大罰惟我先  
帝知公之深既克耆定慰天之心維我天子憂勤宵旰倚  
公界公經綸參贊河北有寇望公之來師干重寄繫公其才虎  
踞龍蟠千秋王氣雄都伊軫殘黎斯寄官則近秘職則封圻苞  
河絡海惠總羣師天生大賢爲國屏輔初扶傾亂逮壹區宇  
冲聖屬心資臬與夸丙寇雖平襟裔未綏梟獍豺狼化爲貔虎  
服公忱恂匪懾予武麟鳳在野鳴鵠遁藏哲人其萎古所慟傷

梅啟照



恭惟夫子瀟湘秀毓衡嶽靈鍾匡時良弼當代儒宗經綸滿腹  
兵甲羅胸德崇忠孝學擅清通操持冰雪氣度雲霞謙以接物  
儉以傳家履仁蹈義存誠閑邪言坊行表白璧無瑕詞館翺翔  
爭呼才子文柄主持羣稱德士躋位貳卿鵬翮高舉應 詔陳  
言 龍顏有喜忽遘閔凶杜門讀禮髮逆猖狂見義而起創立  
楚軍旌旗肅穆 天子知公大事可屬授鉞專征焚香枚卜乃  
統鷹揚次第規復感恩圖報殺賊忘身大小百戰用兵如神十  
年飲血千里無塵東南重奠爲德爲民飲至策勳黃扉正位穆  
穆封侯世襲罔替日月雙輝翎飄孔翠載進宮銜推恩子弟三  
江鎖鑰首推寇公一泣再泣治理雍容沛以甘雨舒以和風持

躬何約艾物何豐偉哉元老 帝倚如山馳驅南北宏濟時艱  
鞠躬盡瘁力竭身疲恨無靈草可駐仙顏膏澤所敷罔不追憶  
召伯之棠株株凝翠峴山之碑人人墮淚方之於今其情豈異  
純臣忠愛惓惓 君王一封遺表慮遠謀臧身墜泉底心立  
闕旁臬謨說命訓詞煌煌 九重知己一代元良飾終令典逾  
越尋常易名晉秩荷 國寵光有丈夫嗣各秉義方名登農部  
譽噪膠庠貂蟬滿屋象笏盈床明德之後百世其昌

孫衣言

嗚呼昔子瞻之祭歐陽文忠其詞有曰民有父母國有著龜斯  
文有傳學者有師君子有所恃而不恐小有所憚而不爲譬

如大川喬嶽不見其運動而功利之及於物者不可以數計而周知予嘗讀而偉之以爲此固子瞻之知言而自古大臣魁閥正直非如歐陽公者誠不足以語斯而又疑此鉅人之特出殆將曠百世而庶幾不謂有我公之卓絕及我生而得見而又獲親炙以追隨嗚呼自古賢聖與夫豪傑間出之士其所以有爲於世者固欲符其志之所蘄而其事之能濟與否則常視乎所遭之幸不幸而非人力之所能施方公之以兵部侍郎誓師鄉里囚湖湘之眾用彭楊羅李之才轉戰十年而遂以覆狐狸之窟穴拯東南之孤離此其功名之不世固歐公所未及爲而其文章之恢奇浩瀚學術之廣博精微貫古今於懷抱羅百家而

兼該以視歐公又可謂齊驅並驟殊塗而同歸然歐公當明道  
慶厯之間雖亦嘗困於夏竦藍元震遷謫而憂疑而自仁宗之  
末造厯英宗之首基由臺諫登侍從掌帝制筦樞機其立朝執  
政固當厯歲移時而史亦稱其左右兩宮坐鎮四海蓋白首而  
不衰至其同時大臣如杜富韓范皆志同道合左絜而右提而  
石介曾鞏蘇軾轍之徒又相與切劘以道義揚厲其光輝是其  
才未必果盡所用而其志可謂不謬所期嗚呼以公之大度偉  
略深謀遠規挺危蹤以孤立恃 聖主之獨知彼流俗之無識  
或貌敬而心非而淺夫之憤媚甚至於負恩忘義勝訕造謗而  
不自知其爲翼轂而胎魴故世之論公以謂其皇皇若弗及戚

戚若不怡由功高而志下亦道尊而氣卑而我之窺公則固知其內視一己固有未滿之素志外觀斯世尤有無窮之憂危嗚呼昔子瞻之從文忠也有子由以與之偕而我之得出於公門我弟方將使指而南馳當 文宗皇帝之初元公方復講書之舊儀而大臣有不然者我弟獨密疏力爭以爲此忠臣之至慮邇治之綱維及我弟爲小人所中我方從公於軍中獨召語我而累欬至於今已逾十年我弟方有以自得於山巔水澗而公之惓惓不已猶欲引而置之殿墀嗚呼此其道義之相契亦何待於執几杖以趨陪矧如予之無狀視子瞻固無能爲役而飄搖江海又一時所棄遺豈謂公之推轂屢有味其言之雖舉世

皆嫌其愚直而公獨以爲無瞻顧而依違嗚呼越吳瘡痍戎方  
嫚欺大東杼柚極西鼓鼙 大任側席 重華宵衣何一老之  
不弔又孤生之無依然則予之所以爲公齋咨涕洟亦何以易  
子瞻之詞日上爲天下慟而下以哭其私

應寶時

嗚呼自公柄用戡大亂臻大定天下始知事功之成必原本於  
學術之正志乎古者得所恃以爲歸驚乎俗者有所戒而不競  
才氣陵轍者欲有成就而自範於馳驅博辨高智毀方立異之  
徒亦憬然自失不敢以儒爲詬病十餘年來士風一變士氣日  
奮蓋 本朝尊崇正學教思涵育二百餘年天乃篤俾我公大

收其效以章顯作人之盛海內之人莫不祝起居祈壽考有無窮之望於我公謂必長持此泰運也何昊穹之降割忽哲人之云亡豈斯文之將墜抑時數之不常矧感遇而未報如寶時者其曰顧而自傷嗚呼我公有一物未康之懼而在躬弗恤有三軍不奪之概而舍己若遺量不居乎成功而耄勤過於壯往才有餘於濟險而居安惕於處危方重涖兩江之日天子亦以積勞之久俾坐鎮之是資而一心默運萬幾總持人方仰其從容而展布優裕而咸宜夫孰知匪躬之節非徒盡瘁於艱屯危難之時蓋其戰兢臨履自幼學壯行以來未嘗一息之或離也然則公之於世誠無憾於幾微世之賴公安有窮期耶

方鼎銳

惟公生布惠於羣黎死垂聞於美諡復何憾而何悲亦不忤而不愧如公氣質之寬厚智識之高深輔以經術之湛粹學問之精純發爲文章著爲事業莫不經天緯地造道而成仁觀其赫赫之功若日星之炳爛豈燭火之光明挹其休休之度又若江河千頃激之不濁揚之而不澄是以溥海內外知與不知聞其風則如見其人嗚呼相君間世挺生衡嶽孕秀湘水毓靈何才之雄何德之清爰初發迹蜚聲詞職義旗一揮誓掃姦賊旣下壽陽諸道並發爰定皖江迺復建業取將於伍眾皆防特收士至佐後常顯發上嘉乃庸封侯首列初制江南瘡痍不堪



勞之來之吏士胥安 皇帝冲齡賞公碩德枚卜良相用參勿  
密戡亂卹災進賢取傑定法務平治道期益綏柔遠人不隨不  
激 上念吳民惟公去思俾公再臨撫我烝黎民飢公食民寒  
公衣 上思相賢每飯不遺期公壽考尙多謠謨天平孰忍奪  
公至斯

吳大廷

嗚呼時難未已公胡云亡中外震悼匪獨余傷憶昔粵逆煽禍  
一方轡楚踰鄂遂穴建康公以卿貳讀禮家居 帝曰咨汝往  
簡師徒公曰艱哉臣敢不力採幹搤巖誓殄此賊乃率子弟鼓  
行而東剗湘剗岳爰成鄂功眾謂義聲可吞石岡賊旗反走師

老豫章不蜚不鳴再蹶再起竟克僞都報功 天子北定中原  
南平吳越孰非自公勛庸卓絕公何能然知人善任文武同升  
賢能並進猶有餘暇雅歌投壺投戈息馬敦禮說書片善微長  
兼收並蓄士林爭趨如射有鵠煌煌金陵六朝所都四夷懷畏  
萬姓懽呼一調赤畿仍鎮南國君子有歸小人蒙澤嘗考古人  
罕公其伍郭李無文韓范不武况崇正學程朱爲傳經術鄭賈  
文章韓歐他人有一皆足名世獨在我公猶爲餘事嗚呼我公  
世仰天人一朝怛化薄海呻吟一樽致奠泣涕陳詞爲天下痛  
兼哭其私嗚呼哀哉

尹耕雲

嗚呼公生六十有二年自翰林以至宰相爵位躋於躬桓勲業  
紀於旂常出億萬蒼生於水火而登之衽席運天下大器於將  
恐將懼而措諸磐石之基功成者退溘然與世長辭德被生民  
澤垂後世古今曾不幾人而抑又何悲然天下無賢不肖而皆  
爲流涕况其所拔識與提撕當耕雲之出參豫軍公數以書來  
將欲振飢鷹之鍛翮飾駑馬以銜轡時方迫於戰事身不獲從  
而心則許以馳驅及公之治兵周口開府近畿嘗一再奉書於  
節下而往來展謁於階墀見公之疲於屢視而步履有待於扶  
持又語言之漸澀覺神明之就衰竊計當今之世 冲主緝熙  
聖學 兩宮求治而孜孜信天心之仁愛必不遽奪我皋夔孰

意大星之既隕所謂鞠躬盡瘁者公可以見 三祖 六宗於  
陟降而告臣職之無虧獨不解眾萬之生不少耄耄與期頤彼  
何修而獲此胡獨於公靳其施縱不計一人之修短豈不念民  
生之休戚與海宇之安危此耕雲之所爲撫膺太息而不能自  
已於涕洟蓋外有感於天下之故而內以哭其私嗚呼哀哉

易佩紳

祝融之陰漣湘之間篤生我公命世大賢維公之功慘淡經營  
手挈江淮還之 大清維公之德真實不欺過也皆見光明無  
虧維公之學包舉漢宋本末精蘊一空聚訟維公之量函蓋羣  
倫曷大曷高細流纖塵維公之風警輶闕替提倡英才先自吾

楚凡諸盛美奚待具陳 朝有良史野有公論惟予小子私心  
竊悼四顧乾坤莽莽誰告去歲之冬貸餉東行天假其緣見公  
金陵公開東閣款畱信宿懽者平生誨言肫篤謂功與名時數  
有定惟道與德乃自爲政平生服膺本如此言經公印證此志  
彌堅今年二月公薨於位我行辭公甫距五日舟泊岳陽哀音  
忽聞北望江天風雨晝昏自公召我十有三年今始一見遂判  
人天物各有羣人各有類不從其類誰拯誰庇從違有分行藏  
有命自安其命何悔何病一身行藏不煩公念天下滔滔公豈  
無憾中原巖平邊方未肅元氣蕭條奸宄叢簇所望於公大柄  
終屬次第區畫以竟全局豈止江左一隅受福嗚呼已矣公逝

何速海夷滑夏致戎已久公爲其難頗憫多口我知公意中必不苟待時而動轉旋在手以此川公畧得樞紐嗚呼已矣誰圖其後大道不明俗學相倣德行事功各爲一黨世無全才民物安仰幸公長存作育日廣登高一呼眾山皆響嗚呼已矣曠然天壤今公靈輻返於故園尊酒瓣香聊陳几筵未盡之言俯仰一哭風馬雲車公靈往復

曾文正祠雅集圖記

王定安

同治十三年冬十月太傅曾文正公祠落成其弟澄侯都轉謀於湘人士仿香山洛社故事選高年耆宿負時望有文行者若而人讌集詞東軒圖形壁間復詩以張之嗚呼盛矣先是

天子嘉念公勲

詔所蒞行省皆建祠於是天津金陵安慶南昌武昌同時鳩工  
蒺事而湖南爲公鄉里中興來達官貴人徧天下所養走卒躋  
大僚者相踵醵金庀材尤易舉其規模壯闊延袤數十畝繚以  
周牆繞二塘其中崇堂峻宇既莊既肅危亭瞰青飛榭激素翼  
如繚如環倣殊觀諸老旣醉且樂屬定安記之因舉觴言曰海  
內失承平二十年矣當道光末造上下恬熙姦人伏草莽卵育  
胎孽日肆以大有司務爲姑息苟簡飾美言欺罔大吏大吏因  
之欺

朝廷罔又加甚焉至於癰潰腫決不可收拾乃張皇補苴驅疲

瘞之卒馭之以衰衣匍步之將一蹶再蹶而大局糜爛不可爲  
矣公以儒臣奮起閭里無度支轉運之供羽檄徵調之權又非  
素習孫吳而夙養技擊鷹揚之士也徒以忠誠感召率二三迂  
儒樸士張空拳持白梃以號其鄉人子弟於是豪傑驤起帕首  
縛袴釋農耜而操利刃霆擊湘漢席捲三吳義旗所向金石摧  
靡然猶跼蹐於章水躑躅於祔門內訐外閤含訥尤積十餘  
載而後擒渠掃穴以竟厥功蓋經營若斯之難也今寰宇久安  
將閱一紀後生新進狃於軍功保薦之速嬉游宴處動至大官  
欲問湘軍創立之規艱苦百戰之迷茫然不可復識又安知此  
烜烜赫赫者固倡於二三儒生之所爲哉君子居安樂不敢忘



憂危之境回憶寇盜縱橫湖湘騷動居人洶洶攜老幼走避山谷間登高瞭遠烽火達旦不息或扁舟隱匿浮湛於蒼煙白浪之中與葭葦菰蒲相枕藉鳥驚魚駭一日數遷當斯時苟得一椽之安豆羹麥飯以爲生人大幸矣豈尙冀夫賓朋遊讌之樂園林暇豫之觀哉今吾與諸老徜徉湘上飲酒爲驩觀山水之雄輝悅風日之晴美澗松答嘯園鞠扇英瞬百代於須臾納宇宙於一室幽躡遙睇陶然自得以視疇昔之流離轉徙其欣戚悲愉爲何如也古之騷人遷客登山臨水憑弔往蹟雖在異世猶流連慨慕不置矧吾所躬歷而目覩者耶揚子雲曰當其有事也非蕭曹子房平勃樊霍則不能安當其無事也章句之徒

相與坐而守之亦無所患然則吾輩之居安履順得舉一觴以  
相屬者豈可不知所自耶諸老咸建余言命勒諸石並列姓氏  
官閥年歲如左

曾文正祠落成會澄侯邀同次青仲雲力臣宇恬芝田子  
殺鼎丞爲主人約予暨紫樓仙嶠鶴村映雲研生海華  
海琴海青諸老爲耆年會並圖形壁閒因賦詩一首紀  
之卽用文正集中題郭筠老詩集原韻 楊彝珍

咸豐元二兵戈作傾洞風塵振寥廓殺人流血丹川原積骸幾  
欲彌溝壑十村九室無炊煙乾坤極目何蕭索沿江千里鮮堅  
城倚山一角餘殘郭我輩全生麋鹿羣匪匿巖阿卽林薄穆穆

白髮垂兩耳滑滑赤泥沾雙腳顧影只爲朝暮人浮生飄泊將  
安託亂定驚魂久始蘇追維往事猶如昨差喜湖湘無旱潦頻  
歲秋原俱有穫故人爲我舉文尊有酒盈觴良不惡不圖時局  
有今朝開軒且對黃花酌語多不覺杯行遲縱談文雅雜諧謔  
猶憶蛇豕莽縱橫俄頃頓如風掃箐微管孰成一匡功反手補  
天匪意度指揮運策失蕭曹慷慨登壇起衛霍夙志思屠大海  
鯨時會適與陽九遘遂使天地還清夷仍令井里勤耕鑿安堵  
不教雞犬驚宿巢只聽烏鳥樂似此眞爲不世勲曾錫茅土膺  
封爵代興自宜有達人已見錚錚露鋒鏑未冠早能讀父書聞  
人賦就年猶弱勅剛通侯弱冠揭來新構丞相祠兩載經營工

始落我來瞻拜薦藻蘋恍接精靈共唯諾回思往昔參翱翔四方角遂渾無著祇今箕斗負虛名念之不免懷慙忤比偕詩虎與酒龍如吸百川了不涸列筵何止具八珍餘炙還供奴子嚼就中不少禿鬢翁延年休藉上池藥倚杖頻頻再拜難直取儀文概刪略從來短景難少延半由膏火相煎灼吾儕俱是山澤癯故爾大年齊龜鶴恥營聲利逐夸毗粗有生涯甘淡泊大名應許萬古垂視彼蟬蜩羽奚若請看壁上鬚眉蒼竊與宗臣遺像錯

曾文正祠雅集性老作詩盛述文正勲伐其辭美矣茲復就文正學術推闡言之仍用原韻呈會中諸公

王定安

屈賈長徂聖不作騷人豪士兩寥廓衡雲跼蹐顏無光久乏新  
吟慰林壑相公崛起漣湘間上闕皇墳窮邱索當時才子數湯  
梅何子幾輩能文有楊性郭仙筠頗聞下筆回萬牛淋漓元氣肆  
噴薄乾嘉以來宗許鄭鑽就六經矜註腳爬翳櫛垢日以新蹈  
躐乘瑕各有託曲證古書辨眞贋引伸異詁判今昨每因一字  
費萬言如耕百晦詡一穫顧閩江敷誇經神錢王繼武亦不惡  
此外紛紛數十家清聖濁賢同一酌漢徵宋幟互詆謔出奴入  
主相嘲謔相公讀書化癡癡如响秋風掃寒籥綿袍森立繫墜  
緒段借旁通戒臆度欲融門戶銷眊驪未許邱垤誚衡霍問字

喜從揚雄醉說理夢與紫陽還力求寔事矯空疏兼崇義理恥  
穿鑿軒旋大道追姬孔况有奇勲邁管樂聽履早登三公堂析  
珪更僭通侯爵芟除蕪穢還清明長驅妖魅飽鋒鏑偶然撫夷  
示包荒徐圖自強非示弱胡天不慙遺一老三年回首傷搖落  
諸道爭建葛相祠銘勲屢荷 聖皇諾憶昔烽火徧東南四

海有家無處著老扶幼攜苦奔波芒屨避走眞羞忤豈期轉幹  
愚公手大傾河漢活乾涸卽今湘上會耆英黃花釀酒恣大嚼  
滿堂爭看雙鑠翁沃若春意含紅藥興酣慷慨談往事益因懃  
定欽英略此祠此會足千古豈與萬物同銷灼我廁末座無鬚  
髯甘嘲雜雞伴老鶴孱足脆羽慙雄姿謬附鳳鶩且飄泊文章

自古有異調陽剛陰柔寧相若請君試讀皇甫詩氣格頗與昌  
黎錯

同人作九老會郭筠仙中丞先期解纜去性農丈首唱七  
言詩用文正公題筠仙詩集韻余以五言和之仍步原

韻兼呈諸公

李元度

同治十三載閩海鯨波作臨軒咨舊弼氛祲待摧廓飛鴻昔  
道消巨魚今赴壑來爾濟川才橫海疆戎索曾帥首詣闕  
繼者中丞郭吾儕與中丞交誼頗不薄昔君撫嶺南陽春歌  
有腳同調恣抨擊乞骸容疾託優值憶南齋巢痕故如昨戀  
闕隔九閭樹人思百稷有詔起東山往靖海氛惡同岑悵

分袂祖餞開樽酌豈惟敘契闊亦用恣諧謔何圖去帆疾有似  
風吹箠送者自崖反禮儀還卒度仍約鬬華筵摩刀聲霍霍霜  
高蟹正肥持螯興騰遶綠酒潑葡萄黃梁飽精鑿未祖千里程  
且永一日樂九老與七賢序齒不序爵緬懷文正師千將懷鋒  
鏑功成荷殊錫彤弓紀繁弱專祠今考宮燕飲成可落天生  
救時相不隨眾唯諾攬轡奠神州國手爭一著嗟我昔從公中  
蹶良自忤未遂鯤溟化甘同鮒轍涸何幸拜崇祠屠門過而嚼  
枵材愧蔓苓怕說籠中藥但祝寰海清諸公奮雄略趨朝任  
量寄旂常光炳灼而我託喬蔭間雲隨野鶴洛社陪耆英相遭  
淡與泊飲酒和陶潛聽琴識賀若年年此高會觥籌許交錯



曾文正祠雅集詩

黃文琛

年至謝簪紱嘯歌天地清微管聖所歎望古據今情崇祠峙鄉  
國用答元功成耆俊此高會故實畱湘衡是月涉霜序晚菊芬  
落英華鐙繼白日豐廚移珍烹賓主大驩洽醉稱千歲觥窺鏡  
鬢眉肖彈毫珠玉并僉曰鐘之壁不讓嵩洛名願予愧衰劣亦  
復相酬廣回首兵禍初承乏專邊城尙記石鼓山擎舟祖戎行  
一別疏音問烽檄頻遙驚十年備艱厄乃得江淮平於茲樂無  
事疇不受其生練吉來展拜獨薦將虔誠

朱克敬

板蕩羣黎厄忠貞獨力扶九州完解瓦一德運神樞釋負民心

固推誠士氣孚組紱羅將相旌帛禮師儒轉敗功由忍彌譏道  
在愚艱難馮鄧比勛業范韓無弔古詞人集崇功廟貌都丹青  
瞻畫像豁達想宏模荆轲蒐遺寶班門少棄構如公長柄國誰  
更哭窮途

求闕齋弟子記卷三十二終